

**Berken Bereh**

**ÊŞ**

**Helbestin bijartî**

Berken Bereh: ÊŞ

Ji weşanên SÎ

2001

Çapa dijîtal

Malpera Amûdê

2/2002

[www.amude.de](http://www.amude.de)  
[info@amude.de](mailto:info@amude.de)

Çapkirin bêyî destûra

Berken Bereh û malpera Amûdê qedexe ye

## PÊŞGOTIN

min ev helbest  
ji jiyaneke bextreş  
hizan û  
bi pepukî bihurî derxist  
Û min ev  
li moxila berxwedanê xist  
bi xwîna şehîdan şûşt  
bi xeyalên dîlan xemiland  
ji ber vê  
kesên dil kîroşk, tirsok  
û ne xwedî gotin  
ji spêdre  
bila nexwîne.

## GER HÛN BIXWAZIN

Ger hûn bixwazin  
Binasin êş û jan û kovaniyê  
Şevêk li welatê min bibin mêvan.

Ger hûn bixwazin  
Binasin mirinê  
Li baskên qulingên koçber binihêrin  
Bêhna şewatê tê ji wan.

Ger hûn bixwazin  
Evînê binasin  
taldeya rojhilata dilê xwe bipelînin  
bê çawa diteyisin bi ken stêrk.

Ger hûn bixwazin  
Welatê min binasin  
Vekin deriyê agir û rojê  
kevoka mirovheza heftreng  
Dê bifire ber bi we.

## ROJBAŞ

hûn her şeveq tîn  
bi çavên xwe yên xilmaş bûyî  
bi xeyalên xwe yên esmer  
û bi cil û bergên zîval -zîvalî  
mêvaniya vî dilê çikspî.

hinek ji we lal in  
hinek ji we ker û qop  
"s"yê dîke "ş"laleş  
hûn tev "o" yê dikin "û"  
roj heta dawî  
wek palyaçoyan em dibêrêve ne.

hûn her roj tîn  
bi stranên xwe yên bê miraz  
bi destên xwe yên xizan  
û zimanê jibîrbûyî  
bi herikîna her dilopek evîna min  
guleke vedibe di bîbûka çavên we de.

wisa dilsoz û wisa diltenikin hûn  
dûrû û nemelaqî nebûye para we  
bi deng difikirin û diramin  
ji gulekê naziktire bedena we  
gotinek nexweş bê gotin  
awirek nexweş bê vedan  
dicemide dilê we  
agir xwe berdide hinavan

her şevê tîn şagirtên min  
ji bo evîne,  
şaristanî,  
zanyariyê  
mîna pisîkek navmalî rudinin  
mîna karxezalek  
û gelek caran parîk nan jî nexwarine

biborin zarokno!  
ez jî dilkovan û jehrxwarim  
vêdişêrim xizanî û tengezariya xwe  
vedişêrim dudiliya xwe  
ji vê jiyana çêbûwar.

lê bibexşînin  
her ku hûn bibêjin "rojbaş"  
bêhtir berxwedêr dibim  
bêhtir bi jiyane ve tem girêdan ez!

## MIRINEKE BÊDENG

quncikek xewleyî tarî a jiyânê;  
dipêşbirkê de ne qulingên baskzîv  
goga wan rojiya mirinê.

hêdî hêdî û nerm û nerm  
roj dema dixeyide ji gerdûnê  
şerm dîke, sorsorkî dibe  
wisa  
dîwar winda bû ewil  
kulîna gulgulî piştê  
çavên min barkirin ji ser rû  
ne ji dengê  
ku mîna gayê serjêkiri  
orîna neviyên mođolan bû ya  
minê bigota qey  
di xwewneke tahlökî de  
avjenî dikim ez.

sirsirka di hejmart  
kêliyên şoravî  
bi qewlê beqên avî  
îroj bîst û çar bû  
şanzdeh rojên din  
wê yek derî nemîne  
girtî li bihûştê horiyan

çivîkan anî  
mizgîniya dilê we yê kezebşewat  
çavên we yên karxezalî  
hevqas belok nîn bûn çî ma  
u mîna korek  
jiyane dipelînin  
an  
gumana we heye  
ji azadiyê  
lew ma  
qasî qultek xwerû to  
bi çermê wêrekiyê dipêçim  
û berdidim ji lutkeyan  
pîroz dikim dahatûya li goma.

îroj ne baş im  
çemekî tehl diherike  
ber bi dev;

ji asika qulqulî  
bablîsok lidarî  
li ser tiliyan  
û ji guliyan  
şewatek dogehî dizê.

roj heftê û çar caran hûr bû  
heftê melayketan zend û bendê xwe şidandin  
heft bira û heft xwişkan  
hefsed derî rûxandin  
û di kevaneka jî de  
bi heft tîpa navek hat kolandin.

spas  
ne hewceye  
stêrk di cihê xwe de xweşin  
kulilk li bahçeyan  
dest û pêçî di kar û xebatê de

roj nîvro  
xwedevand dihesidin  
ji delaliya bejnkulilka  
şeytên dike xwe bixwe ji kerba  
ecacok di kuna xwe de dilerize  
û dibeice mela  
peyv di gewriya wî de bi singeşing digindire

navê min  
bêhneke xweşî mize  
radipêçe bajêr seranser  
koroyek diafire lezûlez

Koro/  
te nepejirand  
jiyanek sîqalî  
hê bîst salî  
bîst cara bîst bû temen  
honikahiya ba  
germahiya rojê  
bêhna kulilkên çiyê  
û tahma hingiva şemzînanê  
tu yî  
bi navê te sond dixwin  
bi dilsozî  
çiyayî!

Kilamekî distrê dengbêjekî kor  
Ji xeynê rojê



Gulberoj dikevin dîlanê.  
Û ez jî  
Li ser dengê bajêr direşînim xweliya te  
Ji bo pêşerojê!

## BÊGUMAN

Bêguman  
Tiştine xweşik jî diqewimin  
Van rojan  
dixwazin bankayek damezirînin kurd  
Malperek hatiye avakirin di internetê de  
Şaxek zêde bû ye li partiya gel  
Kovarek... pirtûkek din tê weşandin  
Hê berf ne bariye hûn dizanin  
Rê û robar tev de vekirîne  
Xalê xelef ji nexweşxanê derketiye  
Keçeke serî li NÇMê daye  
dixwaze hînî zimanê xwe bibe  
Rojname dîsa dest bi dayina pêvekê kir  
Roja şemiyar  
Nameyek şandiye hevala min  
Bi peyvên ji gul çêbûyî  
Du rist zêde bûn li helbesta min  
Piştî mehekê.  
Guh bide stranên kalekî  
Veke deriyê dilê xwe heta dawî  
here li çolê bigere hinekî  
cixarek bikişîne li bin siya darekî  
bikişîne nava xwe bayê ji çem difûre  
hinavê mirov honik û paqij dike  
Bê guman va  
Tiştine xweş jî çêdibin  
Li nîv-welatekî.

## JI KERBA

Me xwe dirêj fikir her şev  
Li ser doşekên hirî  
Pala xwe dida  
Stranên tije hêvî-girî  
Çaya qedexe vedixwar  
Cixara qaçax dikişand  
Li ser banên ji herî.  
Û me  
Bi dilovanî  
Bi evîndarî temaşe fikir  
Agirê şivanên pîroz  
Yê li ser çiyayê hemberê me vêdiket.

Xewn û xiyalên me radigihandin bajarên dûr  
Qulingan ref bi ref  
Jêbirka êş û janan bû  
Bayê Cûdî yê hênik  
Awazên zîz û diltenik.

Hinekî lêv zuwa  
Qirik tahl  
Xizan jî bûna  
Me nedida jiyana xwe  
Bi ya qralan.

Niha giya jî şîn nabe  
Ji şerma xwe  
Çivîk hew tolaz difirin  
Û stêrk naçirûsin  
Li gundê me yê talankirî.

Ji kerba  
Bi keskesora xemilîne xewnên me  
û stranên me  
hê bêhtir tije mêranî!

## BIBORIN

Ez  
Ken û hêvî  
Dil û evîna xwe diguvêşim  
Li ser  
Êş û jan û birînên we direşim  
Ger min destûr negirtibe ji we  
Li min biborin!

## DAXWAZ

Dixwazim  
hew binase  
ew dilê delal  
ew dilê xweşik  
ew dilê tenik û mindal  
êş û janan

Bila bi binevş û beybûna bixemilin  
xewn û xiyal,  
bila tim bazdin bextewariyê  
ew destên hevrişimî  
çavên karxezal,  
û bila ji wê bedena te ya narîn  
tenduristî bifûre  
sibeh, şev û êvar!

## DERGÛŞ

çi bêjim bê feyde ye  
hatin û çûn a min bi hev ra  
ji xwe  
hê nav jî li min nehatibû kirin.

## DAYIK

va bêbavan  
pirtukên pîroz jî nexwendine  
ji evînê bê par in  
berxê min di dergûşê de ma  
destên min bûn dareke hişk  
û me hev hembêz nekir.

## ZAROK

min digot qey  
ev jî listokek e  
hey hawar dikim  
kes nayê banga min  
goga bavê min îroj kirî jî  
ma di hewşê de  
wê kî pê bilîze gelo  
kes ma?

## MAMOSTE

çiqas li min xweş dihat  
evînê hînê zarokan kim  
hevaltî, biratîyê  
hê zengila betlanê lê nexistibû  
ev mirin çima  
û li depreşê nivco ma  
nivîsa serfiraziyê.

## AXA

ev çend mal û milk  
ev çend dirav û zêr  
û bêdadiya min  
nekarî rawestîne mirinê  
min digot wê em ne tê de bin  
çima em haydan nedan?

## XORT

min gustîlkek kirîbû  
ji bo gulbihara xwe  
va em bi hev re çûn  
wê bidin yeke din  
min ji bo wê hewce nema.

## HELBESTVAN

kê digot  
wê evqas bi wate be helbesta me  
ku tucar pêûsa min  
xwîn nerijand.

## ŞIVAN

hê nû zayîbû  
berxa bizîna bedew  
yekcar şîr nemêtîbû hê  
li ber xwe nakevim  
bizanin  
me bi hev re veşêrin  
di bextê we de me  
bi seyê har re.

## XWEDA

e jî şaş mam, bawer kin  
kê destûra vê komkujiyê da?  
li min biborin  
ketime bextê we

## MIROVAHÎ

hûn bi hev re mirin  
bi wekhevî, bi biratî  
rûreşî para me!

## DÎROK

bû deqek tenî  
rûnişt li ser eniya min  
navê te Helebçe



## PERE

roj 24 saet  
li vî bajarê kûnde  
tu yî axaftina sereke  
ey pere!  
sondxarime  
mirina min bi destê te be jî  
naçim ji te re sicde!

## DE WERE

roj bihûrîn  
demsal,sal  
çend cara kûlîlk vekir darbehîv  
hîv xwe çend cara nû kir  
nayê hejmartin mehrûmê  
tu nehatî!

ne şêx ne mişarix  
ne axa ne beg  
qeşmerek nema  
min xwe ne avêtiyê  
tu cardin nehatî!

temen tirş  
rû tije kirş  
bajar  
hejar û jar ma  
min efara te jî xwar  
yar  
de were!  
de were!  
jiyan li min bike bihar!

## BAJARÊ ZAROKTIYA MIN LÊ BIHÛRÎ

Piştî deh salan  
-nepirsin çima?  
bû me mêvan  
bajarê zaroktiya min lê bihûrî  
tîrmeh giya nehiştîbû tevde hişk  
quling daketî bûn lûtkeyên zinaran ji germa  
bajar dinav bahoz û toz  
bajar qalik digûherand  
û tu dibêjî qey  
ne baran û berf  
dirav barîbû bi salan.

li bajarê zaroktiya min lê bihûrî  
ne dehla Miradê Hûhan mabû  
ne aşê Xalo Şahîn  
ne keniya hemgê Bilal  
ne rû yê bajar yê kizirî  
hatibû jibîrkin roja gûnayê jî.

bajarê zaroktiya min lê bihûrî  
her sibeh  
bi diravan dişo  
rû yê xwe!  
mînak bûkek dixemile  
bi gulên bi destçêbû yî  
bê bêhn  
ne xwezayî.

bajarê zaroktiya min lê bihûrî  
dest û ling mezin kiribû bê hempa  
lê ser  
wek berê dergûşî  
bê hîs  
sews  
û gêj.  
çend dirûşmên me mabûn  
çend ramûsan  
li ser dîwaran  
min wan da hev  
niha pênc rûbarin  
diherikin li kolanan  
û ji nûve şax veda  
hêvî bi renga pirpirokan.

li bajarê zaroktiya min lê bihûrî  
mirovêkî kal  
bû lewendekî xort  
vegera min bi kubarî

gavên min tije fort!

## Ç A R Î N

Çil sal xelatî ne rojek neyartî  
aştîxwaz,xêrxwaz û gerdûnî be  
gel perwer,mirov perwer,mêvan perwer be  
da tu car roj ji ser jiyana te kêr ne be!

## Ç A R Î N

roj bihûrîn,demsal sal  
ne bira ne birazî ma ne mam ne jî xal  
rû qermeçî, guh sist bû bû me kal  
bi serneketim; ne welat bû azad ne bûm xwedî dost û yar!

## HER EZÊ BIMIRIM

Li ser wechê stranan kul û keseran kon vegirtiye  
Di Dîroka bajarê zarokatiya min a bi xwin hatiye nivisandin da  
Bizanin  
hûtên rûreşiyê  
avakarên bêdengiyê  
kurmên ji xwina min zîldayî  
heta ku  
li kolanên xewnên min evîndarên kelogirî  
li ser pêşîra min bendemanên bêrîkirinê  
ji gulên evînî û azadiyê  
ji fêkiyên tahmhingiv têt nebin  
ne ji ya xwe têt xwar  
ne jî serî li ber we ditewinim!

û tu  
Yara dil lim qijilandî  
Carek ne kenî ji min re  
Ramûsanekê ne şînî ji durva jî  
Nayê hedara min  
Roj hezar carî  
Agirê ji bo te têt gurkirin  
Hestên xwe pê neşûm.

û dawî  
Ji min gotin  
An tu yê werî min bi bextewariyê bikujî  
An ji kerba nehatina te ezê xwe bikujim!

## KENGÊ EM BÊNE BA HEV

kengê em bêne ba hev rû bi rû  
çavên te min dibin deryayên bê ser û binî  
agirek dojhê berdide hinava min  
lêvên ji şekirê quloqulo û sorsorkî  
çivîka tolaz a hestan difire ji ser dil  
û dest û lingên min xar û vaçî dibin.  
Nizanim çima?

bayê çiyayê li pora te aliqî  
girêka dixê deng û awazan  
peyvên xweşik kû min ji bo te amade kiribûn  
dixeyidin ji min  
qudûmên min dişkên  
nikarim xwe liser lingan bigirim  
dilerizim  
spiçolkî dibe rû  
nizanim çima?

Kengê em bèn ba hev rû bi rû  
Em neyên ba hev çêtir e  
An wê  
Minak berfa tav dîtî bihelim û bimirim  
An jî  
Ji hesûdiyê wê bajar xwe bikuje.

## BI ME RE XWEŞ E

em dibêjin stranan herî xweş delala min  
herî xweş em dînvîsin û dixwînin helbestan  
û dema me hez kir  
ji vira heta ba Xwedê  
mînak serkaniyek zela û paqij  
wek şîrê dayikan  
helal û avnedîtî.

bêhtir li bejn û bala me tê kovanî delala min  
hesret bêhtir li me  
û necamêrî  
hê neketiye ferhenga me.

jiyan bi me re xweş e delala min  
hevaltî bi me re  
wek sûlavek  
wek çemê Dijle nazenîn  
diherikin di masûlkeyên jiyane de  
dijîn  
tê ra xwe.

bi me re xweş e bîranîn delala min  
mirin bir me re xweş e  
li ser çiyayekê  
di grewekê de  
di dil da evîn  
berxwedayî heta dawî.



## XWENÎN

ne rengên me mînak hev bûn  
ne temen  
ne jî  
xewn û xeyal  
û xwestekên me  
di navbera me de  
bi hezaran kilometr rê  
deryayên bê binî hebûn.  
Lê dema mijar bû evîn  
nekarî xwe  
ev dilê jar, û xênedîtî  
şkênand dab û nêrît û zincîran.

## HELBESTEK NÎVÇEMAYÎ

naxwazim  
di wêneyên zerbûyî de birizin  
hêvî, daxwaz û xwestekên te  
lê  
va rojêke din jî perpitî û mir  
rojêke din jî bihurî bê miraz  
de ka stranekê bibêje dengbêjo  
stranek ku dinê pê biheje  
û ez jî vekim kutiya dilê xwe  
helbestek bihonim ji me re  
ax..ax.....ax...

Ne bû  
Dîsa wek gelek caran  
Mîna kabûsek xwe berda  
Li ser vi bajarê  
xêr nedîtî  
Baçermokên Romê  
xwînxwar, devbixwîn  
Û  
Bi teq teqa derî  
Reviyan hest  
Raman hê ma  
Ji serî  
Ev helbest jî nivco ma  
Û dîsa xwe avêtin  
Bextê berxwedanê  
Evîndarên evînê  
dilketiyan Kurdistanê.

## HETA MIN JI TE HEZ NEKIR

Heta min ji te hez nekir

Xortekî kerr

Lal

û

Kor bûm.

Heta min ji te hez ne kir

Tucar nediguherî demsal

Daran xwe ne dixemiland

Bi pelg û kulîlk

Roj ne dibîşirî û

Germ nedikir

Bajar, kolan û zevî

Jiyan wiha têrtam û

Ne xwedîwate bû.

Niha har û din im

Ji bo evina te

Ey welatê nav li min kirî

Necar, hedad

Hostayê min

Ne tenê te

Ji dar û beristan

Mar û moristan

ji Derd û belayên te ji

Hez dikim.

## QELEN

feleka xayin  
ji xelkê ra  
şîr û mast  
ji me re  
êş û jan  
xem û kul  
didoşe.

ka bêje  
ey feleka xayin  
qelenê te  
çend qurîş e?

ger xwîn bixwazî  
va ye ez  
serê xwe datînim  
li ber xencerê  
pêşî min bikuje !

## STRANÊN ME

Naxwazim  
stranên me  
yên ku  
bi naveroka xwe  
mînak biharên rengîn in  
stêrkan dibarînin  
û ronahî dîkin şevên me yên reştarî  
bikevin  
bîrên bê bin.

stranên me  
yên ku  
ji sedsalan û virde  
kurteçîroka me ne.

## RÊWIYÊ TENÊTIYÊ

bi çavên kelogirî  
bi rûyek kovanî jê dirije  
rêwî me ber bi tenêtiyê.

di dilê min ê hejar de  
agirê gundên şewitandî  
di guhê min de  
nalîna zarokên Helebçê û  
barê sewalên bê hêlîn mayîn jî  
xwe berda ser navmilan.

ji vê êşa mirovkuj re  
ne bayê payîza hênîk kar dike  
ne stranên lehengiyê  
ne jî cixara  
ji tituna Muşê hatî pêçan.  
û mînak bizmarek li serê min bê kutan  
xaltika xecê tê ber çav  
û ji xwe dipirsim;  
tevî çar mindalan  
li bajarên mêtîngeran  
wê çawa debara xwe bike.  
lo...kesên ne aştxwazin  
Xwedê mala we xira bike.

bi hevaltîya heyvek melûl  
bi lez û bez  
xatir dixwazin  
banî  
dar û ber  
û çemên welatê min.  
wek çivîkek baskşkestî  
wek masiyek bê av mayî  
digevizim  
diperpitim  
di deryaya tenêtiyê de  
li dengê nas  
li destekî germ digirim  
da xwe pé bigirim.

mînak dayika min a diltenik dibîşire û  
hembêz dike,  
agirê li li ser çiyayê kêleka çepê vêketî.

## ÇÎROK

hê di zarokatiya xwe de jî  
rûken  
hişaza  
û pir jîr bû.

bav digot bila bibe parêzer  
da bê parastin  
mafên mirovan  
dê digot bila bibe bijîşk  
bo bibe derman  
ji xwedî nexweş û  
birîndaran re

bû bersîv  
ji bo her du daxwazan  
bo welat bibe azad  
mirov bibin xwedî maf  
bibin şareza

xwe bi ava nemiriyan şûşt  
çû ket nav refên gerîla

## RÊWÎ

piştî  
pênc salên nefiyê  
rêwî me  
ber bi welat.  
mîna mindalekî çar salî  
bêsebir  
û bê tebat im.

zû bajo ajoye  
min bigihîjîne  
cihê bav û kalan  
dîsa bikevim kulateyn a  
xalê Xelef  
nanê xaltîk a xanê bixwim  
li ser tenûrê  
Û dîsa bi hevakan re  
birgê bileyîzim  
li qada serhildanê.

bajo ajoye zû bajo!  
naxwazim bimirim  
çav vekirî.



## BI XATIRÊ WE

Îşev  
dîl dibêje  
rahêje  
çeltika hestan  
û xwe  
dî kolan  
û kuçeyên  
vî bajarê  
xopan de  
berde.  
her deriyek  
pariyek  
li ber her dilek  
bîhnek  
bisekine û  
bicivîne  
êş û janan  
paşê  
xwe bi ba yê  
zozanên me yên hênik  
çemên Dijle û Ferat  
werde.  
dakeve  
li ser çiyayên me yên  
ku bi hezaran karxezalên me  
bûne nêçîr  
xwe bi xewn û xeyalên wan rapêçe  
û xwe  
dî qada şer de  
berde.  
  
rêwî me  
ber bi jiyaneke buhuştî  
bi xatirê we!

### **Berken Bereh:**

- Di sala 1954'an de ji dayik bûye
- Di sala 1980'ê de helbesta wî di kovara Tîrêj de hate weşandin û ta niha gelek helbestên wî di Nûdem, A.Welat, Jiyana Rewşen, Avesta, Hîwa, Mehname, Nivîs û hwd. Hatine weşandin
- Di dawiya 2001'ê de berhemk wî bi navê "ÊŞ" ji weşanxaneya SÎ li Stenbolê derket.

